

ԱՌԱՋԱՐԿՈՒԹՅՈՒՆՆԵՐ

«ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱԿՐԹԱԿԱՆ ՀԻՄՆԱԿԱՆ ԾՐԱԳՐԵՐ
ԻՐԱԿԱՆԱՑՆՈՂ ՌԻՍՈՒՄՆԱԿԱՆ ՀԱՍՏԱՏՈՒԹՅՈՒՆ ՍՈՎՈՐՈՂԻ ԸՆԴՈՒՆԵԼՈՒԹՅԱՆ,
ՏԵՂԱՓՈԽՄԱՆ ԵՎ ԱԶԱՏՄԱՆ ԿԱՐԳԻ» ՆԱԽԱԳԾԻ ՎԵՐԱԲԵՐՅԱԼ
(ԱՅՍՈՒՇԵՏԵՎ՝ ԿԱՐԳ)

1. Նկատի ունենալով, որ կարգը անդրադառնում է նաև հաստատությունից սովորողների տեղափոխմանը և ազատմանը, ուստի վերնագրում պետք է կատարել փոփոխություն, որովհետև եթե հանենք «ընդունելության» բառը ապա կստացվի «..... հաստատություն սովորողի տեղափոխման և ազատման կարգ», որը շարահյուսական սխալ ձևակերպում է: Առաջարկվում է «ընդունելության» բառից հետո լրացնել «և հաստատությունից» բառը (հանելով կետադրական նշանը): Համապատասխան փոփոխությունը (կամ լրացումը) կատարել նաև Կարգի 1-ին կետում:
2. Նկատի ունենալով, որ Կարգը վերաբերվում է դպրոցահասակ երեխային, ուստի առաջարկվում է՝ Կարգի 1-ին կետում, «կարգավորվում են» բառերից հետո, լրացնել «դպրոցահասակ» բառով:
3. Կարգի 5-րդ կետում «Ծնողի (նրա օրինական ներկայացուցչի) կողմից» բառերից առաջ լրացնել «երեխային 1-ին և (կամ) 10-րդ դասարաններում ընդունելու համար» բառերը:
4. Կարգի 6-րդ կետը առաջարկվում է շարադրել հետևյալ խմբագրությամբ. «Ընդունելությունը դպրոցի 1-ին և (կամ) 10-րդ դասարաններում կատարվում է տվյալ տարվա հունիս-օգոստոս ամիսներին»:
5. Կարգի 7-րդ կետում
 - 1) «2-րդ» ենթակետում «ծնողի» բառը փոխարինել «մասնագիտական խմբի» բառերով
 - 2) «3-րդ» ենթակետում «ցածր» բառից հետո լրացնել «մասնագիտական խմբի առաջարկությամբ» բառերով:
6. Կարգի 19-րդ կետում «անհամապատասխանության դեպքում՝ մեկ դասարան բարձր» բառերը փոխարինել «ցածր լինելու դեպքում մեկ դասարան բարձր կամ մեկ դասարան ցածր՝ կրթական աստիճանի տևողությունը բարձր լինելու դեպքում» բառերով:
7. Կարգի 20-րդ կետի 3-րդ ենթակետը շարադրել հետևյալ խմբագրությամբ «3) 10-12-րդ դասարաններում՝ ուսումնառությունն ընդհատած դասարանում»:
8. Կարգի 25-րդ կետի 4-րդ ենթակետում «սովորողի «Անձնական գործ» գրքույկը (բացառությամբ առաջին դասարան և ավագ դպրոց ընդունվելիս)» նախադասության մեջ անհասկանալի է, պահանջը վերաբերվում է տվյալ դպրոցի ավագ դպրոցի՞ն, թե՛ առանձին գործող ավագ դպրոցին:
9. Կարգի 25-րդ կետի 4-րդ ենթակետում «տեղեկանք ընթացիկ գնահատականների մասին» պահանջից բացի պարտադիր է նաև պահանջել «տեղեկանք բացակայությունների քանակի մասին»:
10. Կարգի 26-րդ կետում «Սովորողի ընդգրկումը դպրոց» նախադասության մեջ ընդգրկում բառը հակասում է Կարգի վերնագրին. պետք է լինի՝ «Սովորողի ընդունումը դպրոց»:
11. Կարգի 26-րդ կետում հստակ չէ՝ 1-ին դասարան ընդունվող երեխաները ենթակա՞ են հաշվառման, թե՛ հաշվառումը աշակերտների համակազմի (կոմպլեկտավորման) տվյալները ներկայացնելուց հետո ընդունվածներին է վերաբերվում:

12. Նկատի ունենալով, որ կարգի 25-րդ կետի 8-րդ ենթակետով պահանջվում է սովորողի տեղափոխման թերթիկ, ուստի Հայաստանի Հանրապետությունում սովորողների ընդունման և տեղափոխման միասնական փաստաթղթաշրջանառություն վարելու և տարբեր «թերթիկներ, ձևեր, տեղեկանքներ» կիրառելուց խուսափելու նպատակով խիստ անհրաժեշտություն է, որպեսզի սույն կարգով, որպես հավելված, հաստատվի նաև «Հանրակրթական ուսումնական հաստատության սովորողի տեղափոխման տեղեկանք», «Հանրակրթական ուսումնական հաստատության սովորողի ընդունելության տեղեկանք» ձևերը, ինչպես նաև տրվի դրանց լրացման ցուցումները:
13. Կարգում տրված չէ սովորողի առանձին գործող դպրոցի /միջին, հիմնական, միջնակարգ/ 5-րդ դասարան ընդունվելու պայմանները:
14. Կարգում տրված չէ դպրոցի և ծնողի միջև կնքվող կրթական ծառայությունների մատուցման մասին պայմանագրի կնքման և լուծարման պայմանները: Նկատի ունենալով նաև այն հանգամանքը, որ պայմանագիրը կնքում է հիմնականում երեխայի ծնողներից մեկը՝ հայրը կամ մայրը, իսկ շատ հաճախ տարբեր պատճառներով անհրաժեշտ է լինում երեխայի անձնական գործերը վերցնել կնքած ծնողի բացակայության դեպքում, առաջացնելով պայմանագրի լուծման պայմանի խախտում, ուստի անհրաժեշտ է կարգով այն կարգավորել:
15. Կարգում տրված չէ կրթական 2-րդ և 3-րդ աստիճանի ուսումնառության ավարտական համապատասխան ավարտական փաստաթղթի ստացումից հետո սովորողի ազատման կարգը:
16. Կարգի «Սովորողի ընդունելությունը, տեղափոխումը» բաժնի վերնագիրը ցանկալի է ոչ թե ստորակետով առանձնացվի, այլ՝ «և»-ով. /«Սովորողի ընդունելությունը և տեղափոխումը»/:
17. Կարգում դասարանի աստիճանը հաճախ նշվում է տառերով, հաճախ՝ արաբական թվով: Օրինակ. «Առաջին դասարան». «1-ին դասարան»:
18. Կարգի 26-րդ կետից առաջարկում է հանել «անվանացանկի վրա կատարում է նշում՝ «Հաշվառված է» և ստորագրվում է: Մակագրված անվանացանկը պահպանվում է ընդունող դպրոցում» բառերը, որովհետև մարզպետարաններում էլեկտրոնային փաստաթղթաշրջանառության պարագայում այդ կերպ հաշվառում կազմակերպելը լրացուցիչ դժվարություն է ստեղծելու և բացի դրանից ժամկետի պահպանման առումով խախտումը երկկողմանի թաքցնելու հնարավորություն է ընձեռում:
19. Հաճախ, առանց դիմումի և զգուշացնելու, երեխան թողնում է դպրոցը կամ տեղափոխվում արտերկիր, դրանով ավելորդ դժվարություն ստեղծում դպրոցի համար: Խնդիրը կարգավորելու համար առաջարկվում է 27-րդ կետը լրացնել նոր 3-րդ կետով, հետևյալ բովանդակությամբ՝
 «Առանց սովորողի ծնողի դիմումի և առանց պայմանագիրը օրենքով սահմանված կարգով լուծելու հիմքով ուսումնական տարվա ընթացքում դպրոցը թողած (առնվազն մեկ ամիս դպրոց անհարգելի չհաճախած) և տվյալ դպրոցում ուսումը չշարունակել ցանկացող սովորողի բացակայության և դպրոց չհաճախելու պատճառները պարզաբանելուց հետո դպրոցի տնօրենը միակողմանիորեն լուծում է սովորողի ծնողի հետ կնքված պայմանագիրը և սովորողին ազատում դպրոցից: Այս հիմքով ազատված սովորողը, անկախ դպրոցը թողնելու ժամանակահատվածից, նախկին դպրոցում չի փոխադրվում հաջորդ դասարան»:
20. Կարգի 28-րդ կետում «28-րդ կետով» բառերը փոխարինել «կարգի 27-րդ կետի 1-ին ենթակետով» բառերով: